



千日造水滸 三日寫封神

千日造水滸，三日寫封神，係講用了盡久時間，又當用心寫个書，嘎險險惹來殺身之禍；後來，又用短短時間，癩癩痴痴寫出來个書，倒轉嘎救了自家个老命，實在係世事無常啊！

聽講元朝末年，張士誠造反，施耐庵係佢部下一个一隻軍師。後來，張士誠投降元朝，施耐庵就園在屋下，一片讀書，一片寫水滸傳，用了年零个時間，寫好水滸傳前六十回。

恁堵好，厥妹仔愛定人咧！就問厥爸愛拿麼个分佢做嫁妝？厥爸也無麼个好分佢，就講：「哎！就這六十回个書分你啦！平時可以看，係講有困難，就拿去書館換兜錢來使用。」

妹仔嫁出去以後，正經堵著困難，就拿厥爸个書去賣。書館頭家看著這書寫到恁好，就挑挑像賣布毋帶尺——存心不良樣，想愛謬佢騙過來抄，斯講頭家無在，你先放這，三日後正來拿。厥妹仔毋知係計，就轉去咧！無想著，等到三日後，頭家就謬書還佢，講自家早就有咧。

厥妹仔拿等文稿，噉等轉去尋厥爸。就講：「阿爸，你做毋得用別人有个書來騙佢啊！」斯謬事情經過講出來。厥爸講：「你中計咧，阿爸無騙你，佢兜在這三日內，就謬這本書全部抄去啦！」

厥妹仔當關，關到像人桿蠅蛤蟆——氣難消共樣，想愛尋佢算數。施耐庵安慰佢：「算咧啦！該本書斯六十回定定，佢還有更精彩个，過謬你寫過，比原來个還較好看。」斯恁樣，施耐庵又用全部精力，用了年零時間，繼續寫後六十回，前後總共用了三年，千零隻日仔，書寫好咧，就分厥妹仔。

新寫好个《水滸傳》，當好看。聽講羅貫中去佢屋下看著這本書，硬硬看到呆忒，看到茶毋記得飲，話毋記得講，一直到蠟燭都點淨淨咧，正上眠床。難怪厥妹仔用這新寫个《水滸傳》拿分另隻書館，頭家看了以後，一下仔斯用高價買去。盡遽就印出來，一傳十，十傳百，當受人歡迎，旋風之間就賣淨淨，連皇帝也知咧！

無想著，天有不測風雲，人有旦夕禍福，皇帝看了以後，當關，佢認為這愛造反咧，噢，原來佢係張士誠个部下，係毋係對佢不滿呢？好啊，謬佢捉起來。

好朋友劉伯溫知佢坐監以後，又毋敢出面救佢，想來想去，想著一計，就寫幾句話暗中送分佢：「萬歲火著，其情難講；記得，仰般來，仰般去。」施耐庵實在聰明啊！斯像窗門頂个紙共樣——一點就破。佢心肝肚想：「佢寫書惹禍，還係愛寫書脫身啦！」精神一來，斯用三日三夜个時間寫出了《封神演義》分朱元璋看。

朱元璋看這裡背全部係神奇古怪，屙痢屙肚，無正經得斯，原來係隻癩仔啊！劉伯溫接等佢个話講：「係啊，佢正經係隻癩仔，萬歲啊！關隻癩仔，有麼个意思？」施耐庵就恁樣放出來咧！

無想著，千日造水滸，嘎分人關；三日寫封神，顛倒出頭天，正經係世事難料啊！

作者：何石松

☆詞彙學習☆

【挑挑】tiau` tiau`：故意的意思。

【當關】dong` ad：非常生氣。

【噉等】giau` den`：哭著。

【旋風】hien fung`：忽然、很短的時間。